

四庫全書

史部

欽定四庫全書

史部

明史卷一百九十三

御史臣李陽榘覆勘

總校官編修臣朱鈴

欽定四庫全書

明史卷一百九十三

大學士張廷玉等奉勅修

列傳第八十一

費宏

弟家徙子繼中

翟鑾

李時

顧鼎臣

嚴訥

表一煒

李春芳

孫思誠等

陳以勤

趙貞吉

殷士儋

高儀

費宏字子充鉛山人弱冠舉成化二十三年進士第一授修撰弘治中遷左贊善直講東宮進左諭德武宗立擢太常少卿兼侍講讀預修孝宗實錄充日講官正德二年拜禮部右侍郎尋轉左五年進尚書帝耽於逸樂早朝日講俱廢宏請勤政務學納諫報聞魯府鄒平王子當漢當襲父爵為弟當涼所奪且數年矣宏因當漢奏辨據法正之當涼怒誣宏受賂宏不為動明年冬十

二月命宏兼文淵閣大學士叅預機務尋加太子太保武英殿大學士進戶部尚書倖臣錢寧陰黨宸濠欲交歡宏餽綵幣及他珍玩拒却之寧慙且恚宸濠謀復護衛屯田輦白金鉅萬徧賂朝貴寧及兵部尚書陸完主之宏從弟編修案其妻與濠妻兄弟也知之以告宏宏入朝完迎聞曰寧王求護衛可復乎宏曰不知當日革之者何故完曰今恐不能不予宏峻却之及中官持奏至閣宏極言不當予詔卒予之於是宸濠與寧合而恚

宏寧數偵宏事無所得以御史余珊嘗劾案不當留翰  
林即指為宏罪中旨責陳狀宏乞休命并案致仕寧遣  
騎伺宏後抵臨清楚其舟資裝盡燬宏歸杜門謝客宸  
濠復求與通宏謝絕之益怒會宏族人與邑奸人李鎮  
等訟宸濠陰令鎮賊宏鎮等遂據險作亂率衆攻費氏  
索宏不得執所與訟者支解之發宏先人塚毀其家劫  
掠遠近衆至三千人宏馳使懇於朝下巡撫孫燧按狀  
始遣兵勦滅宸濠敗言者爭請召宏世宗即位遣行人

即家起宏加少保入輔政宏持重識大體明習國家故事與楊廷和蔣冕毛紀同心協贊數勸帝革武宗弊政大禮之議諸臣力與帝爭帝不能堪宏頗揣知帝旨第署名公疏未嘗特諫以是帝心善之及廷和等去位宏為首輔加少師兼太子太師吏部尚書謹身殿大學士委任甚至戶部議督正德時逋賦宏偕石琚賈詠請斷自十年以後從之帝以四方災異勅羣臣修省宏等因言陛下用度無節工役不休畿內土地半成莊田內庫

收納要求踰倍太倉無三年之積而冗食日增京營無  
十萬之兵而赴工不已直臣得罪未見原言官舉職乃  
被詰律所當行者數經讞不誅罪無可辨者遽傳旨獲  
免干和名怨自非一端帝引咎褒答然不能用也大同  
兵變張璁請討之宏曰討而勝玉石俱焚不勝彼將據  
城守損威重多矣莫若觀變而徐圖之事果旋定宏為  
人和易好推轂後進其於大禮不能強諫亦未嘗附離  
而是時席書張璁桂萼用事書弟檢討春故由他曹改



用及武宗實錄成宏議出為僉事書由是憾宏璉等由  
郎署入翰林驟至詹事舉朝惡其人宏每示裁抑璉等  
亦大怨帝嘗御平臺特賜御製七言一章命輯倡和詩  
集署其銜曰內閣掌叅機務輔導首臣其見尊禮前此  
未有也璉等滋害宏寵等言詩文小技不足勞聖心且  
使宏得馮寵靈凌壓朝士帝置不省等遂與璉毀宏於  
帝言宏納郎中陳九川所盜天方貢玉受尚書鄧璋賕  
謀起用并及其居鄉事宏上書乞休畧曰等璉挾私怨

臣屢矣不與經筵講官則怨不與修獻皇帝實錄則怨  
不為兩京鄉試考官則怨不為教習則又怨萼璉疑內  
閣事屬臣操縱抑知臣下采物望上稟聖裁非可專擅  
萼璉日攘袂撻擊覬覦臣位臣安能與小人相齟齬祈  
賜骸骨不允及璉居兵部宏欲用新寧伯譚綸掌奮武  
營璉遂劾宏劫制府部無何又因宏子懋良坐罪下吏  
攻之益力復錄前後劾疏上之不得請則力求罷詆宏  
尤切章數上宏亦連疏乞休帝輒下優詔慰留然終不

以譴璉萼於是奸人王邦奇承璉萼指上書汙故大學士廷和等并誣宏宏竟致仕去時六年二月也十月璉遂以尚書大學士入直內閣間一歲萼亦入矣十四年萼既前死璉亦去位帝始追念宏四月再遣行人即家起官如故七月至京師使中使勞以上尊御饌面諭曰與卿別久卿康健無恙宜悉心輔導稱朕意宏頓首謝自是眷遇益厚偕李時召入無逸殿與周覽殿廬從容笑語移時始出賜銀章曰舊輔元臣數有咨問宏亦竭

誠無隱承璵等操切之後易以寬和朝士皆慕樂之未  
幾卒年六十有八帝嗟悼賻卹加等贈太保謚文憲宏  
三入內閣佐兩朝殆十年中遭讒構訖以功名終其自  
少保入也弟案為贊善從子懋中由進士及第為編修  
宏長子懋賢方改庶吉士父子兄弟並列禁近案官至  
少保禮部尚書謚文通懋中終湖廣提學副使懋賢歷  
兵部郎中宏世父瑄成化十一年進士弘治時為兵部  
員外郎貴州巡撫謝杲總兵官吳經等奏爛土苗反僭

稱王乞發大軍征討以兵部尚書馬文升請令瑄與御史鄧庠往按白苗無反狀撫定之勅杲經及鎮守中官張成罪遷貴州叅議以終

翟鑾字仲鳴其先諸城人曾祖為錦衣衛校尉因家京師舉弘治十八年進士改庶吉士正德初授編修劉瑾改翰林於他曹以鑾為刑部主事旋復官進侍讀嘉靖中累遷禮部右侍郎六年春廷推閣臣帝意在張孚敬弗與命再推乃及鑾中貴人多譽鑾者帝遂踰次用之

楊一清以鑾望輕請用吳一鵬羅欽順帝不許命鑾以吏部左侍郎兼學士入直文淵閣尋賜銀章曰清謹學士鑾初入閣一清謝遷輔政既而孚敬與桂萼入鑾皆謹事之孚敬萼皆以所賜銀章密封言事鑾獨無所言詰之則頓首謝曰陛下明聖臣將順不暇何獻替之有帝心愛之一清等孚敬先後罷鑾留獨秉政者兩月其後李時方獻夫入位皆居鑾上鑾亦無所拂帝數召時鑾入見嘗問都察院擬籍谷大用貲產當乎時鑾皆北

人與中貴合時曰所擬不中律鑒曰按律籍沒止三條  
謀反叛逆及奸黨耳不合三尺法何以信天下帝曰大  
用亂政先朝正奸黨也鑒曰陛下即天也春生秋殺何  
所不可帝卒從重擬丁生母憂歸服闋久不召夏言顧  
鼎臣居政府鑒與謀召已會帝將南巡慮塞上有警議  
遣重臣巡視言等因薦鑒充行邊使十八年二月改兵  
部尚書兼右都御史諸邊文武將吏咸受節制且齎帑  
金五十萬犒邊軍東西往返三萬餘里明年春入京遂

命以原官入閣在大同與總督毛伯溫議築長堡過甘肅與總督劉天和議拓嘉峪關皆受廕叙二十一年言罷鑾為首輔時已加少保武英殿大學士進少傅謹身殿嚴嵩初入鑾以資地居其上權遠出嵩下而嵩終惡鑾不能容御史趙大佑劾鑾私同年吏部尚書許讚亦發鑾請屬私書帝皆不問會鑾子汝儉汝孝與其師崔奇勛所親焦清同舉二十三年進士嵩遂屬給事中王交王堯日劾其有弊帝怒下吏部都察院鑾疏辨引西



苑入直自解帝益怒勒鑾父子奇勛清及分考官編修  
彭鳳歐陽暎為民而下主考少詹事江汝璧及鄉試主  
考諭德秦鳴夏贊善浦應麟詔獄並杖六十褫其官鑾  
初輔政有修潔聲中持服家居至困頓不能自給其用  
行邊起也諸邊文武大吏俱橐鞬郊迎恒恐不得當鑾  
意饋遺不貲事竣歸裝千輅用以遺貴近得再柄政聲  
譽頓衰又為其子所累訖不復振踰三年卒年七十穆  
宗即位復官謚文懿

李時字宗易任邳人父榮進士萊州知府時舉弘治十五年進士改庶吉士授編修正德中歷侍讀右諭德世宗嗣位為講官尋遷侍讀學士嘉靖三年擢禮部右侍郎俄以憂歸服除為戶部右侍郎復改禮部尋代方獻夫為尚書帝既定尊親禮慨然有狹小前人之志欲裁定舊章成一朝制作張孚敬夏言用事咸好更張所建諸典禮咸他人發端而時傳會成之或廷議不合率具兩端待帝自擇終未嘗顯爭以故帝愛其恭順四方上

嘉瑞輒拜疏請賀帝謙讓時必再請由是益以時為忠  
賜銀章曰忠敏安慎俾密封言事久而失之請罪帝再  
賜焉十年七月四郊成加太子太保雷震午門彗星見  
東井時請勅臣工修省令言官指陳利害興革帝以建  
言乃科道專責寢不行光祿寺厨役王福錦衣衛千戶  
陳昇請遷顯陵於天壽山時等力陳不可巡檢徐震奏  
於安陸建京師時等駁其非制遂議改州為承天府其  
秋桂萼卒命時兼文淵閣大學士入叅機務時張孚敬

已罷翟鑾獨相時後入以宮保官尊反居鑾上兩人皆  
謙遜無齟齬帝御無逸殿召時坐講無逸篇鑾講豳風  
七月詩武定侯郭勛及九卿翰林俱入侍講畢帝退御  
豳風亭賜宴自是數召見諮謀政務明年春孚敬還內  
閣事取獨裁時不敢有所評議未幾方獻夫入與時亦  
相得彗星復出帝召見時等諭以引咎修省之意從容  
語及乏才時等退條上務安靜惜人才慎刑獄三事頗  
及大禮大獄廢斥諸臣帝優詔褒答之然卒不能用也

給事中魏良弼御史馮恩先後劾吏部尚書汪鉉觸帝  
怒時皆為論救十二年孚敬復入鑾以憂去獻夫致仕  
時隨孚敬後拱手唯諾而已以故孚敬安之孚敬謝政  
費宏再入未幾卒時遂獨相時素寬平至是益鎮以安  
靜帝亦恒召對便殿接膝咨詢時雖無大匡救而議論  
恒本忠厚廷論咸以時為賢客星見天棓旁帝問所主  
事應對曰事應之說起漢京房未必皆合惟在人君修  
德以弭之帝稱善扈蹕謁陵道沙河帝見居民蕭索愴

然曰七陵在此宜加守護時對曰昔邱濬建議京師當設四輔以臨清為南昌平為北薊州保定為東西各屯兵一二萬今若於昌平增一總兵可南衛京師北護陵寢帝乃下廷臣勘議於沙河築鞏華城為置戍焉屢加少傅太子太師吏部尚書華蓋殿大學士會夏言入輔時不與抗每事推讓言言亦安之帝待時不如孚敬言然少責辱始終不替孚敬言亦不敢望也十七年十二月卒官贈太傅諡文康

顧鼎臣字九和崑山人弘治十八年進士第一授修撰  
正德初再遷左諭德嘉靖初直經筵進講范浚心箴敷  
陳剴切帝悅乃自為註釋而鼎臣特受眷累官詹事給  
事中劉世揚李仁劾鼎臣汙佞帝下世揚等獄以鼎臣  
救得薄譴拜禮部右侍郎帝好長生術內殿設齋醮鼎  
臣進步虛詞七章且列上壇中應行事帝優詔褒答悉  
從之詞臣以青詞結主知由鼎臣倡也改吏部左侍郎  
掌詹事府請令曾子後授五經博士比三氏子孫從之

大同軍變張孚敬主用兵鼎臣言不可帝嘉納十三年  
孟冬享廟命鼎臣及侍郎霍韜捧主二人有期功服當  
辭乃上言古禮諸侯絕期今公卿即古諸侯請得毋避  
禮部尚書夏言極詆其非乃已尋進禮部尚書仍掌府  
事京師淫雨四方多水災鼎臣請振饑弭盜報可十七  
年八月以本官兼文淵閣大學士入參機務尋加少保  
太子太傅進武英殿初李時為首輔夏言次之鼎臣又  
次之時卒言當國專甚鼎臣素柔媚不能有為充位而



已帝將南巡立皇太子命言扈行鼎臣輔太子監國御史蕭祥曜劾吏部侍郎張潮受鼎臣屬調刑部主事陸崑為吏部潮言兵部主事馬承學恃鼎臣有聯自詭必得銓曹臣故抑承學而用崑帝下承學詔獄鼎臣不問十九年十月卒官年六十八贈太保謚文康鼎臣官侍從時憫東南賦役失均屢陳其弊帝為飭撫按巡撫歐陽鐸釐定之崑山無城言於當事為築城後倭亂起崑山獲全鄉人立祠祀焉

嚴訥字敏卿常熟人舉鄉試以主司試錄觸忌一榜皆不得會試嘉靖二十年成進士改庶吉士授編修遷侍讀三吳數中倭患歲復大侵民死徙幾半有司徵斂益急訥疏陳民困請蠲貸帝得疏感動報如其請尋與李春芳入直西苑撰青詞超受翰林學士歷太常少卿禮部左右侍郎改吏部皆兼學士仍直西苑所撰青詞皆稱旨禮部尚書郭朴遷吏部遂以訥代之朴遭父喪復代為吏部尚書嚴嵩當國吏道汙雜嵩敗朴典銓猶未

能盡變訥雅意自飭徐階亦推心任之訥乃與朝士約  
有事白於朝房毋謁私邸慎擇曹郎務抑奔競振淹滯  
又以資格太拘人才不能盡倣先朝三途並用法州縣  
吏政績異者破格超擢銓政一新尋錄供奉勞加太子  
太保四十四年袁煒罷命兼武英殿大學士入參機務  
以代者郭朴未至仍掌銓政帝齋居西苑侍臣直廬皆  
在苑中訥晨出理部事暮宿直廬供奉青詞小心謹畏  
至成疾久不愈其年冬十一月遂乞歸踰年世宗崩遂

不復出訥既歸里父母皆在晨夕潔餐孝養人以為榮  
訥嘗語人曰銓臣與輔臣必同心乃有濟吾掌銓二年  
適華亭當國事無阻且所任選郎賢舉無失人華亭謂  
徐階選郎則陸光祖也家居二十年卒年七十有四贈  
少保謚文靖袁煒字懋中慈谿人嘉靖十七年會試第  
一殿試第三授編修煒性行不羈為御史包孝所劾帝  
宥不罪進侍讀久之簡直西苑撰青詞最稱旨三十五  
年閣臣推修撰全元立掌南京翰林院帝特用煒煒疏

辭願以故官供奉帝大喜立擢煒侍講學士甫兩月手  
詔拜禮部右侍郎明年加太子賓客兼學士賜一品服  
三十九年復以供奉恩加俸二等俄進左侍郎明年二  
月調吏部兼官供奉如故踰月遷禮部尚書加太子少  
保仍命入直煒自供奉以後六年中進宮保尚書前未  
有也先是二月朔日食微陰煒言不當救護禮部尚書  
吳山不從得譴去帝聞煒言善之遂以代山及七月朔  
又日食歷官言食止一分五秒例免救護煒乃阿帝意

上疏言陛下以父事天以兄事日羣陰退伏萬象輝華  
是以太陽晶明氛祲銷爍食止一分與不食同臣等不  
勝欣忭疏入帝益喜其冬遂命以戶部尚書兼武英殿  
大學士入閣典機務累加少傅兼太子太傅建極殿大  
學士四十四年春疾篤請假歸道卒年五十八贈少師  
謚文榮煒才思敏捷帝中夜出片紙命撰青詞舉筆立  
成遇中外獻瑞輒極詞頌美帝畜一猫死命儒臣撰詞  
以醺煒詞有化獅作龍語帝大喜悅其詭詞媚上多類

此以故帝急枋用之恩賜稠疊他人莫敢望自嘉靖中  
年帝專事焚修詞臣率供奉青詞工者立超擢卒至入  
閣時謂李春芳嚴訥郭朴及煒為青詞宰相而煒貴倨  
鮮渙故出徐階門直以氣凌之與階同總裁承天大志  
諸學士呈稿煒竄改殆盡不以讓階諸學士不平階第  
曰任之而已其後煒死階亦盡竄改之煒自負能文見  
他人所作稍不當意輒肆詆誚館閣士出其門者斥辱  
尤不堪以故人皆畏而惡之

李春芳字子實揚州興化人嘉靖二十六年舉進士第一除修撰簡入西苑撰青詞大被帝眷與侍讀嚴訥趙擢翰林學士尋遷太常少卿拜禮部右侍郎俱兼學士直西苑如故佐理部事進左侍郎轉吏部代訥為禮部尚書時宗室蕃衍歲祿苦不繼春芳考故事為書上之諸吉凶大禮及歲時給賜皆嚴為之制帝嘉之賜名宗藩條例尋加太子太保四十四年命兼武英殿大學士與訥並參機務世宗眷侍直諸臣厚凡遷除皆出特旨



春芳自學士至柄政凡六遷未嘗一由廷推春芳恭慎不以勢凌人居政府持論平不事操切時人比之李時其才力不及也而廉潔過之時徐階為首輔得君甚春芳每事必推階階亦雅重之隆慶元年春有詔修翔鳳樓春芳曰上新即位而遽興土木可乎事遂止齊康之劾徐階也語侵春芳春芳疏辨求去帝慰留之及代階為首輔益務以安靜稱帝意時同列者陳以勤張居正以勤端謹而居正恃才凌物視春芳蔑如也始階以人

言罷春芳歎曰徐公尚爾我安能久容旦夕乞身耳居正  
遽曰如此庶保令名春芳愕然三疏乞休帝不允既  
而趙貞吉入代以勤剛而負氣及高拱再入直凌春芳  
出其上春芳不能與爭謹自飭而已諳達款塞求封春  
芳偕拱居正即帝前決之會貞吉為拱逐拱益張修階  
故怨春芳嘗從容為階解拱益不悅時春芳已累加少  
師兼太子太師進吏部尚書改中極殿度拱輩終不容  
已兩疏請歸養不允南京給事中王禎希拱意疏詆之

春芳求去益力賜勅乘傳遣官護行有司給夫廩如故  
事閱一歲拱復為居正所擠幾不免而春芳歸父母尚  
無恙晨夕置酒食為樂鄉里艷之父母歿數年乃卒年  
七十五贈太師謚文定孫思誠天啟六年官禮部尚書  
尋罷崇禎初坐頌璫閒住思誠孫清字映碧崇禎四年  
進士由寧波推官擢刑科給事中熊文燦撫張獻忠清  
論其失策以久旱請寬刑忤旨貶浙江按察司照磨未  
赴憂歸起吏科給事中俄出封淮府國變得不與福王

時請追謚開國名臣及武熹兩朝忠諫諸臣於是李善長等十四人陸震等十四人左光斗等九人並得謚春芳曾孫信廣東平和知縣城破與二子泓遠淑遠同時死

陳以勤字逸甫南充人嘉靖二十年進士選庶吉士授檢討久之充裕王講官遷修撰進洗馬時東宮位號未定羣小多構釁世宗於父子素薄王歲時不得燕見常祿外例有給賜王亦不敢請積三歲邸中窘甚王左右

以千金賄嚴世蕃世蕃喜以屬戶部得并給三歲資然  
世蕃常自疑一日屏人語以勤及高拱曰聞殿下近有  
惑志謂家大人何拱故為諛語以勤正色曰國本默定  
久矣生而命名從后從土首出九域此君意也故事諸  
王講官止用檢討今兼用編修獨異他邸此相意也殿  
下每謂首輔社稷臣君安從受此言世蕃默然去裕邸  
乃安為講官九年有羽翼功而深自晦匿王嘗書忠貞  
二字賜之父喪除還為侍讀學士掌翰林院進太常卿

領國子監擢禮部右侍郎尋轉左改吏部掌詹事府穆宗即位以勤自以潛邸舊臣條上謹始十事曰定志保位畏天法祖愛民崇儉攬權用人接下聽言其言攬權聽言尤切詔嘉其忠懇隆慶元年春擢禮部尚書兼文淵閣大學士入叅機務累加少傅兼太子太傅改武英殿穆宗朝講希御政無所裁決近偉多緣內降得厚恩以勤請勵精修政帝心動欲有所舉措卒為內侍所阻疏亦留中四年條上時務因循之弊請慎擢用酌久任

治賊吏廣用人練民兵重農穀帝嘉之下所司議高拱  
掌吏部惡所言侵己職寢其奏惟都察院議行賊吏一  
事而已初以勤之入閣也徐階為首輔而拱方嚮用朝  
士各有所附交相攻以勤中立無所比亦無私人竟階  
與拱去無訾及之者及拱再入與趙貞吉相軋張居正  
復中搆之以勤與拱舊僚貞吉其鄉人而居正則所舉  
士也度不能為解恐終不為諸人所容力引疾求罷遂  
進兼太子太師吏部尚書賜勅馳傳歸詔其子編修于

陞侍行後二年拱被逐倉皇出國門歎曰南充哲人也  
以勤歸十年年七十復頒上方銀幣命于陞馳歸賜之  
且勅有司存問又六年卒贈太保謚文端于陞別有傳  
趙貞吉字孟靜內江人六歲日誦書一卷及長以博洽  
名最善王守仁學舉嘉靖十四年進士選庶吉士授編  
修時方士初進用貞吉請求貞儒贊大業執政不憚因  
請急歸還朝遷中允掌司業事諳達薄都城謾書求貢  
詔百官廷議貞吉奮袖大言曰城下之盟春秋恥之既



許責則必入城倘要索無已奈何徐階曰君必有良策  
貞吉曰為今之計請至尊速御正殿下詔引咎錄周尚  
文功以勵邊帥出沈束於獄以開言路輕損軍之令重  
賞功之格遣官宣諭諸將監督力戰退敵易耳時帝  
遣中使矚廷臣日中莫發一語聞貞吉言心壯之諭嚴  
嵩曰貞吉言是第不當及周尚文沈束事耳召入左順  
門令手疏便宜立擢左諭德兼監察御史奉勅宣諭諸  
軍給白金五萬兩聽隨宜勞賞初貞吉廷議罷盛氣謁

嚴嵩嵩辭不見貞吉怒叱門者適趙文華至貞吉復叱之嵩大恨及撰勅不令督戰以輕其權且不與一卒護行時敵騎充斥貞吉馳入諸將營散金犒士宣諭德意明日即復命帝大怒謂貞吉漫無區畫徒為尚文東游說下之詔獄杖於廷謫荔波典史稍遷徽州通判進南京吏部主事四十年遷至戶部右侍郎廷議遣大臣赴薊州督餉練兵嵩欲用貞吉召飲示之意貞吉曰督餉者督京運乎民運乎若二運已有職掌添官徒增擾耳

況兵之不練其過宜不在是即十戶侍出何益練兵嵩  
怫然罷會嵩請告吏部用倉場侍郎林應亮比嵩出益  
怒令都給事中張益劾應亮調之南京而改用僉都御  
史霍冀益又言督餉戶部專職今貞吉與左侍郎劉大  
賓廷推不及是不職也宜罷於是二人皆奪官隆慶初  
起禮部左侍郎掌詹事府穆宗幸太學祭酒胡杰適論  
罷以貞吉攝事講大禹謨稱旨命充日講官貞吉年踰  
六十而議論侃直進止有儀帝深注意焉尋遷南京禮

部尚書既行帝念之仍留直講三年秋命兼文淵閣大學士叅預機務貞吉入謝奏朝綱邊務一切廢弛臣欲捐軀任事惟陛下主之帝益喜會寇入大同總兵官趙奇失事總督陳其學反以捷聞為御史燕如宦所發貞吉欲置重罰兵部尚書霍冀僅議貶秩貞吉與同官爭不得因上言邊帥失律祖宗法具在今當事者屈法徇人如公論何臣老矣效忠無術乞賜罷不許俄加太子太保貞吉以先朝禁軍列三大營營各有帥今以一人

總三營權重難制因極言其弊請分五營各統以大將  
稍復祖宗之舊帝善之命兵部會廷臣議尚書霍冀前  
與貞吉議不合頗不然其言廷臣亦多謂強兵在擇將  
不在變法冀等乃上議三大營宜如故惟以一人為總  
督權太重宜三營各議一大將而罷總督以文臣為總  
理報可初給事中楊鎔劾冀貪庸帝已留冀冀以鎔貞  
吉鄉人疑出貞吉意疏辨乞罷且詆貞吉貞吉亦疏辨  
求去詔留貞吉褫冀官其後營制屢更未踰年即復其

舊貞吉亦不能爭也諳達款塞求封貞吉力贊其議先是高拱再入閣即掌吏部貞吉言於李春芳亦得掌都察院拱以私憾欲考察科道貞吉與同事上言頃因御史葉夢熊言事忤旨陛下嚴諭考覈言官并及陞任在籍者應考近二百人其中豈無懷忠報主謇諤敢言之士今一以放肆奸邪罪之竊恐所司奉行過當忠邪不分致塞言路沮士氣非國家福也帝不從拱以貞吉得其情憾甚及考察拱欲去貞吉所厚者貞吉亦持拱所

厚以解於是斥者二十七人而拱所惡者咸與拱猶以  
為憾也嗾門生給事中韓楫劾貞吉庸橫考察時有私  
貞吉疏辨乞休且言臣自掌院務僅以考察一事與拱  
相左其他壞亂選法縱肆作奸昭然耳目者臣噤口不  
能一言有負任使臣真庸臣也若拱者斯可謂橫也已  
臣放歸之後幸仍還拱內閣毋令久專大權廣樹衆黨  
疏入竟允貞吉去而拱握吏部權如故貞吉學博才高  
然好剛使氣動與物迕九列大臣或名呼之人亦以是

多怨高拱張居正名輩出貞吉後而進用居先咸負才好勝不相下竟齟齬而去萬歷十年卒贈少保謚文肅  
殷士儋字正甫歷城人嘉靖二十六年進士選庶吉士  
授檢討久之充裕王講官凡闕君德治道輒危言激論  
王為動色遷右贊善進洗馬直論如故隆慶元年擢侍  
讀學士掌翰林院事進禮部右侍郎未幾改吏部明年  
春拜禮部尚書掌詹事府事其冬還理部事四年正月  
朔望日月俱食士儋疏請布德緩刑納諫節用飭內外



臣工講求民瘼報聞以舊恩進太子太保時寒暑皆罷  
講士僉請如故事四時無輟并進講祖訓及大學衍義  
貞觀政要帝嘉納之始世宗定宗藩條例親王無後以  
兄弟及兄弟之子嗣不得以旁繼嘉靖末肅懷王薨無  
子其大母定王妃請以輔國將軍縉燾嗣禮部議縉燾  
實懷王從叔不可承祧詔許以將軍攝府事及帝即位  
王妃復請前尚書高儀執不可縉燾重賄中官屬宗人  
為奏祈必得士僉持之甚力帝以肅藩越在遠塞不王

無以鎮之遂許縉燾嗣士儋爭曰肅府自甘州徙蘭州  
實內地且請別選郡王賢者理府事毋遂私請壞條例  
而帝意堅不可奪士儋乃請封為郡王諸宗率以此令  
從事帝終不許故事郊畢舉慶成宴自世宗倦勤典禮  
久廢帝即位三載猶未舉行士儋始考定舊儀行之十  
一月命以本官兼文淵閣大學士入閣辦事俄諳達封  
事成進少保改武英殿始士儋與陳以勤高拱張居正並  
為裕邸僚三人皆柄用士儋仍尚書不能無望拱素

善張四維欲引共政而惡士儋不親已不為援士儋遂  
藉太監陳洪力取中旨入閣以故怨拱及四維四維父  
擅鹽利為御史邵永春所劾事已解他御史復及之拱  
四維疑出士儋指益相搆御史趙應龍遂劾士儋進由  
陳洪不可以叅大政士儋再辨求去不允而拱門生都  
給事中韓楫復揚言脅之士儋亦疑出拱指故事給事  
中朔望當入閣會揖士儋面詰楫曰聞君有憾於我憾  
自可耳毋為他人使拱曰非體也士儋勃然起詬拱曰

若逐陳公逐趙公復逐李公今又為四維逐我若能常有此座耶奮臂欲歐之居正從旁解亦諄而對御史侯居良復劾士儋始進不正求退不勇士儋再疏請益力乃賜道里費乘傳歸有司給廩隸如故事家居十一年卒時居正垂沒四維為政怨士儋贈太保謚文通久之改謚文莊

高儀字子象錢塘人嘉靖二十年進士選庶吉士授編修歷侍講學士掌南京翰林院召為太常卿掌國子監

事擢禮部右侍郎改吏部教習庶吉士四十五年代高拱為禮部尚書穆宗即位諸大典禮皆儀所酌定世宗遺命郊社及祔享祔葬諸禮悉稽祖制更定儀乃會廷臣議天地分祀不必改既祭先農不當復祈穀西苑帝社帝稷睿宗明堂配天與玉芝宮專祀當廢孝潔皇后當祔廟別祀孝烈於他所帝皆報可既而中官李芳復請天地合祀如洪武制御史張檟請易皇極諸殿名盡復其舊儀皆持不可帝踐阼四月未召對大臣儀屢請

隆慶二年正月饗太廟帝將遣代儀偕僚屬諫閣臣亦  
以為言乃親祀如禮慶府輔國將軍縉燾請襲王爵儀  
執不從太子生七齡儀疏請出閣帝命待十齡行之詔  
取光祿銀二十萬兩儀力爭初世宗崇道教太常多濫  
員儀奏汰四十八人寺卿陳慶奏供事乏缺儀堅持不  
可掌禮部四年每歲暮類奏四方災異遇事秉禮循法  
居職甚稱引疾章六上卒見留會御史傅寵以先帝時  
撰文叩壇事劾儀儀四疏求去乃加太子少保馳傳歸

歸二年用高拱薦命以故官侍東宮講讀掌詹事府六年四月詔兼文淵閣大學士入閣辦事踰月帝崩預顧命及拱為張居正所逐儀已病太息而已未幾卒贈太子太保謚文端儀性簡靜寡嗜慾室無妄媵舊廬燬於火終身假館於人及沒幾無以殮

贊曰費宏等皆起家文學致位宰相宏却錢寧拒宸濠忤張桂再躡再起終亦無損清譽李時翟鑒皆負才望而鑒晚節不振貞吉負氣自高然處傾軋之勢即委蛇庸

得免乎顧鼎臣等雍容廟堂可謂極遭逢之盛而陳以勤  
誠心輔導獻納良多後賢濟美繼登相位終明之世稱韋  
平者數以勤父子天之報之何其厚哉

明史卷一百九十三



欽定四庫全書

明史卷一百九十三考證

費宏傳宸濠敗言者爭請召宏

臣方煒按宸濠初叛

時遣數十騎趨廣信欲害宏至進賢為劉源清所殺  
宏得免見獻徵錄傳未載謹附考

翟鑾傳言等因薦鑾充行邊使

臣方煒按是時鑾以

巡邊功錄一子錦衣千戶一子中書舍人見王世貞

別集傳未詳載謹附考

李時傳十年七月四郊成

臣

方煒按明史禮志明初

天地合祭至嘉靖九年始定南北郊之制而東西郊  
朝日夕月之壇亦重建傳作十年蓋更建之議始自  
九年而成于十年耳謹附考

李時傳帝退御幽風亭賜宴

臣

方煒按宴儒臣幽風

亭乃是年九月事見明實錄謹附考

顧鼎臣傳帝悅乃自為註釋

臣

方煒按是時嘉靖又

註視聽言動四箴并製敬一箴令天下學校翰林國

子監立碑鐫刻見獻徵錄謹附考

李春芳傳尋遷太常少卿

臣

方煒按春芳官太常時

即賜一品服以其隨侍齋壇也見王錫爵所撰行狀  
謹附考

李春芳傳齊康之劾徐階也

臣方煒按明王世貞所

撰高拱傳拱故與階不相能至是鉤得其子居鄉請  
托事囑門生齊康上之階乃上疏求去穆宗為之謫  
齊康于外傳未叙及謹附考

陳以勤傳賜勅馳傳歸

臣方煒按以勤致仕在隆慶

四年見獻徵錄謹附考

陳以勤傳後二年拱被逐

臣方煒按明王世貞集載

神宗即位初時拱邀張居正共逐太監馮保居正偽許之而先以告保保乃擬旨責拱專擅無君令歸田里傳云被逐蓋指此謹附考

明史卷一百九十三考證

欽定四庫全書

明史卷一百九十四

大學士張廷玉等奉 敕修

列傳第八十二

喬 宇

孫 交 子 元

林 俊 子 達

金 獻 民

秦 金 孫 柱

趙 璜

鄒 文 盛

梁 材

劉麟

蔣瑤

王廷相

喬宇字希大山西樂平人祖毅工部左侍郎父鳳職方郎中皆以清節顯宇登成化二十年進士授禮部主事弘治初王恕為吏部調之文選三遷至郎中門無私謁擢太常少卿武宗嗣位遣祀中鎮西海還朝條上道中所見軍民困苦六事已遷光祿卿歷戶部左右侍郎劉瑾敗大臣多以黨附見劾宇獨無所染拜南京禮部尚

書乾清宮灾率同列言視朝不勤經筵久輟國本未建  
義子猥多番僧處禁寺優伶侍起居立皇店留邊兵習  
戰鬪土木繁興織造不息凡十事帝不省久之改兵部  
參贊機務以帝遠遊塞上而監國無人請早建儲貳帝  
將自擊寇宇復率同列諫皆不報未幾寧王宸濠反楊  
言旦夕下南京宇嚴為警備而談笑自如時攜客燕城  
外密察地險易置戍守綜理周密內外宴然指揮楊銳  
有才畧署為安慶守備鎮守中官劉瑯與濠通為預伏

死士宇刺得其情詰瑯用事者瑯懼不敢動宇乃大索城中斬所伏壯士三百人懸首江上宸濠失內應且知有備不敢東攻安慶銳固守不得下未幾敗帝至南京詔百官戎服朝明年正旦宇不可率諸臣朝服賀江彬索城門諸鑰都督府問宇宇曰守備者所以謹非常禁門鎖鑰孰敢索亦孰敢予雖天子詔不可得都督府以宇言復乃已彬矯旨有所求日數十至宇必廷白之彬亦稍稍止彬欲譖去宇宇備太監王偉者初為帝伴讀



帝信之每從中調護故彬謀不行帝駐南京九月宇倡  
諸臣三請回鑾又自伏闕請駕旋扈至揚州明年加太  
子太保論保障功復加少保世宗即位召為吏部尚書  
宇自為選郎有人倫鑒及是銓政一清帝求治銳甚宇  
與林俊彭澤孫交皆海內重望帝亦委任之凡為權倖  
所黜者皆起列庶位天下欣欣望治帝性剛好自用宇  
所執漸不見聽興府需次官六十三人乞遷敘宇言此  
輩虛隸名籍與見供事者不同黜罰之有差皆怨宇帝

欲封駙馬都尉崔元為侯外戚蔣輪邵喜為伯宇不可  
無何詔進壽寧侯張鶴齡為公封后父陳萬言為伯授  
萬言子紹祖尚寶丞宇言累朝太后戚屬無生封公者  
張巒亦歿後贈今奈何以父贈為子封萬言封伯視巒  
更驟而子授尚寶非制願陛下守典章以垂萬世帝並  
不從史道訐楊廷和宇言道挾私遂下之詔獄曹嘉助  
道劾宇宇求罷帝命鴻臚趨視事宇遇事不可無不力  
爭而爭大禮尤切帝欲加興獻帝皇號宇言加皇於本

生之親則于正統非所以重宗廟正名分及禮官請稱  
獻帝為本生考帝改稱本生皇考又詔建獻帝廟於大  
內宇等復連章諫特旨用席書為禮部尚書宇又偕九  
卿言陛下罷江俊用席書謫馬明衡季本陳逅召張璉  
桂萼霍韜舉措乖違人心駭愕夫以一二人邪說廢天  
下萬世公議內離骨肉外間君臣名為效忠實累聖德  
且書不繇廷推特出內降此祖宗來所未有乞令俊與  
書各仍舊職宥明衡等止璉萼毋召尋復請罷璉萼書

而出爭大禮者呂枏鄒守益於獄會璉等至京詔皆用  
為學士宇等又言內降恩澤先朝率施於佞倖小人若  
士大夫一預其間即不為清議所齒况學士最清華而  
俾等居之誰復肯與同列哉帝怒切責宇遂乞休許  
之馳傳給夫廩猶如故事御史許中劉隅等請留宇帝  
曰朕非不用宇宇自以疾求去耳後明倫大典成追論  
前議奪官楊一清卒宇渡江弔之南都父老皆出迎舉  
手加額曰活我者公也宇幼從父京師學於楊一清成

進士後復從李東陽遊詩文雄雋兼通篆籀性好山水  
嘗陟太華絕頂遇虎僕夫皆驚仆宇端坐不動虎徐帖  
尾去家居澹泊服御若寒士身歿二妾劉許皆從死穆  
宗即位復官贈少傅諡莊簡

孫交字志同安陸人成化十七年進士授南京兵部主  
事為尚書王恕所知弘治初恕入吏部薦授稽勲員外  
郎歷文選郎中居吏部十四年於善類多所推引遷太  
常少卿提督四夷館大同有警命經畧黃花鎮諸邊增

垣塹廣樹藝制敵騎馳突永樂時歲遣隆慶諸衛軍採薪炭其後罷之令歲輸銀二萬兩軍重困交奏免之正德初擢光祿卿三年進戶部右侍郎提督倉場改吏部尚書張綏附劉瑾交數規切綏怒調之南京瑾敗召拜戶部尚書時征討流寇調度煩急仍歲凶正賦不足交區畫適宜四方告饑輒請蠲租遣振以故民不至甚敝而小人用事者皆不便之帝欲以太平倉賜倖臣裴德雲南鎮守中官張倫請採銀礦南京織造中官吳經奏

費乏交皆力爭八年五月中旨與禮部尚書傅珪並致仕言官多請留不報世宗在潛邸知交名甫即位召復故官首請帝曰讀祖訓言動悉取準則經筵日講寒暑勿輟帝褒納焉或議遷顯陵天壽山交言山陵事重太祖欲遷仁祖於鍾山慮泄靈氣而止具載皇陵碑事乃止武宗侈汰之後庫藏殫虛交裁冗食定經制宿弊為清然事涉中官者帝亦不能盡從嘗會廷臣議發內帑給軍廩官俸已報可為中官梁諫等所沮交言官府

異同令出復反非新政所宜不聽中官監督倉場者初止數人正德中增至五十五人以交言罷撤過半其後復漸增帝已罷三十七人交欲盡去之並臨清徐淮諸倉一切勿遣帝令自今毋更加而已守珠池中官詔毋得預守土事而安川黃緣復故交劾川命如前詔正德中上林苑內臣至九十九人侵奪公私地無算帝即位命留十八人如弘治時已復傳奉至六十二人交乞汰如初且盡歸侵奪地報許又論御馬監內臣宜如祖制



毋監收芻豆並令戶部通知馬數杜其侵耗不從錦衣  
百戶張瑾率校尉支俸通倉橫取狼籍主事羅洪載欲  
按之瑾給請受杖奏洪載擅笞禁衛官帝怒逮下詔獄  
謫外交與林俊喬宇先後論救不納御馬監閹洪乞外  
豹房地交言先帝以豹房故貽禍無窮洪等欲修復以  
開游獵之端非臣等所敢聞詔以地十頃給豹房餘令  
百戶趙愷等佃如故奉詔以各宮莊田數視舊籍不同  
帝詰其故交言舊籍多以奏請投獻數多妄報也新籍

少以奉命清核田多除豁也帝意稍解令考成弘間籍以聞交年已七十連章乞罷帝輒慰留遣醫視療請益力乃許之手詔加太子太保馳驛令子編修元侍行有司時存問給食米輿隸復賜道里費卒年八十諡榮僖交言論恂恂不以勢位驕人清慎恬慤終始一致初在南京僚友以事簡多暇相率談諧飲奕為樂交默處一室讀書不輟或以為言交曰對聖賢語不愈於賓客妻妾乎興獻王素愛重交嘗割陽春臺東偏地益其宅後

中官言孫尚書侵地世宗曰此先皇所賜吾敢奪耶元  
進士終四川副使謹厚有父風

林俊字待用莆田人成化十四年進士除刑部主事進  
員外郎性侃直不隨俗浮湛事涉權貴尚書林聰輒屬  
俊治之上疏請斬妖僧繼曉並罪中貴梁芳帝大怒下  
詔獄考訊後府經歷張黻救之並下獄太監懷恩力救  
俊得謫姚州判官黻師宗知州時言路久塞兩人直聲  
震都下為之語曰御史在刑曹黃門出後府尋以正月

朔星變帝感悟復俊官改南京弘治元年用薦擢雲南副使鶴慶元化寺稱有活佛歲時集士女萬人爭以金塗其面俊命焚之得金悉以償民逋又毀淫祠三百六十區皆撤其材修學宮于崖土舍刀怕愈欲奪從子宣撫官刳其印數年俊檄論之遂歸印進按察使五年調湖廣以雨雪災異上疏陳時政得失又言德安安陸建王府及增修吉府工役浩繁財費鉅萬民不堪命乞循寧襄德府故事一切省儉勿用琉璃及白石雕闌請著

為例不從九年引疾不待報徑歸久之薦起廣東右布政使不拜起南京右僉都御史督操江十四年正月朔陝西山西地震水涌䟽述古宮闈外戚內侍柄臣之禍乞罷齋醮減織造清役占汰冗員止工作省供應節賞賜戒逸欲遠佞幸親賢人又請豫教皇儲因薦侍郎謝鐸少卿儲瓘楊廉致仕副使曹時中處士劉閔堪輔導報聞已屢䟽乞休薦時中自代不許江西新昌民王武為盜巡撫韓邦問不能靖命俊巡視身入武巢武請自

効悉禽賊黨詔即以俊代邦問俊引朱熹代唐仲友包拯代宋祁事力辭不允乃更定要約庶務一新王府徵歲祿率倍取於民以俊言大減省寧王宸濠貪暴俊屢裁抑之王請易琉璃瓦費二萬俊言宜如舊毋涉叔段京鄙之求吳王几杖之賜王怒伺其過無所得會俊以聖節按部遂劾奏之停俸三月尋以母憂歸武宗即位言官交薦江西人在朝者合疏乞還俊乃進右副都御史再撫江西遭父憂不果正德四年起撫四川眉州人

劉烈倡亂敗而逃諸不逞假其名剽掠俊繪形捕莫能  
得會保寧賊藍廷瑞鄆本恕廖惠等繼起勢益張轉寇  
巴州猝遇之華壘單輿抵其營譬曉利害賊羅拜約降  
淫雨失期復叛去攻陷通江俊擊敗之龍灘河遣知府  
張敏等追敗之門鎮子遂禽廖惠而廷瑞奔陝西西鄉  
越漢中三十六盤至大巴山官軍追及復大破之遂移  
師擊瀘州賊曹甫且遣人招諭甫佯聽令使弟瑄刦如  
故指揮李蔭斬瑄首賊遂移江津分七營將攻重慶俊

發酉陽播州土兵助蔭以元日掩破其四營賊遁入民  
家焚之盡斃乘勝搗老營指揮汪洋等中伏死蔭復進  
去賊十五里甫以數十騎出遇蔭兵敗走官軍乘勝進  
圍之俘及焚死者二千有奇已本恕廷瑞為永順土舍  
彭世麟所禽俊論功進右都御史甫黨方四亡命恩南  
復攻南川綦江以窺瀘州俊益發土兵令副使何珊李  
鉞等敗之去捷聞璽書獎勵俊在軍與總督洪鍾議多  
左中官子弟欲冒從軍功輒禁止御史俞緇走避賊而



僉事吳景戰歿緇慙欲委罪俊遂劾俊累報首功賊終  
不滅加鑿井毀寺逐僧徒迫為賊於是俊前後被切責  
比方四敗賊且盡俊辭加秩及賞乞以舊職歸田詔不  
許辭秩聽其致仕言官交請留不報俊歸士民號哭追  
送時正德六年十一月也世宗即位起工部尚書改刑  
部在道數引疾不許因請帝親近儒臣正其心以出號  
令用渾樸為天下先初詔所革無遷就以廢公議既抵  
京師會暑月經筵輟講舉祖宗勤學故事以諫俊時年

已七十寓止朝房示無久居意數為帝言親大臣勤聖  
學辨異端節財用朝有大政必侃侃陳論中外想望其  
風采中官葛景等奸利事覺為言官所糾詔下司禮監  
察訊俊言內臣犯法法司不得訊是宮府異體也乞下  
法司公訊以昭平明之治都督劉暉下獄俊當以交結  
朋黨律言與許泰同罪請斬以謝天下廖鵬廖鎧齊佐  
王璵論死屢詔緩刑俊乞亟行誅又劾谷大用占民田  
萬餘頃皆不聽中官崔文家人李陽鳳索匠師宋鈺賄

不獲嗾文杖之幾死下刑部治未決而中旨移鎮撫司  
俊留不遣力爭不納明日又奏帝怒責陳狀俊言祖宗  
以刑獄付法司以緝獲奸盜付鎮撫訊鞠既得猶必付  
法司擬罪未有奪取未定之囚反付推問者文先朝漏  
奸罪不容誅茲復干內降臣不忍朝廷百五十年紀綱  
為此輩壞亂帝憚其言直乃不問俊以耆德起田間持  
正不避嫌既屢見格遂乞致仕詔加太子太保給驛賜  
隸廩如制俊數爭大禮與楊廷和合嘗上言推尊所生

有不容已之情有不可易之禮因輯堯舜至宋理宗事  
凡十條以上及大禮議定得罪者或杖死四年秋俊從  
病中上書言古者鞭撻之刑辱之而已非欲糜爛其體  
膚而致之死也又非所以加於士大夫也成化時臣及  
見廷杖二三臣率容厚棉底衣重氈疊裹然且沉卧久  
乃得痊正德朝逆瑾竊權始令去衣致末年多杖死臣  
又見成化弘治時惟叛逆妖言刳盜下詔獄始命打問  
他犯但言送問而已今一槩打問亦非故事自去歲舊

臣斥逐殆盡朝署為空乞聖明留念既去者禮致未去者慰留碩德重望如羅欽順王守仁呂柟魯鐸輩宜列置左右臣衰病待盡無復他望敢效古人遺表之意敬布犬馬之心帝但下所司而已又明年疾革復上書請懋學隆孝任賢納諫保躬導和且預辭身後卹典遂卒年七十六後一年明倫大典成追論俊附和廷和削其官其子達以士禮葬之俊歷事四朝抗辭敢諫以禮進退始終一節隆慶初復官贈少保諡貞肅達正德九年

進士官至南京吏部郎中工篆籀能古文張黻吉水人  
成化八年進士歷知涪州宿州介特不避權貴弘治中  
俊蒙顯擢而黻老不用王恕為之請特予誥命

金獻民字舜舉綿州人成化二十年進士除行人弘治  
初選授御史按雲南順天並著風裁出為天津副使歷  
湖廣按察使正德初劉瑾亂政追坐獻民勘天津地不  
實與巡撫柳應辰等械繫詔獄斥為民未幾又坐湖廣  
事再下獄罰贖歸踰年又以瀏陽民劉道隆獄讞不實

罰米輸塞下瑾誅起貴州按察使擢僉都御史巡撫延綏歷南京刑部尚書世宗即位召為左都御史李鳳陽下刑部程貴下都察院皆改詔獄獻民力爭已遷刑部尚書執奏奸黨王欽王銓不宜貸死皆不納尋代彭澤為兵部尚書五星聚營室其占主兵獻民因請敕天下鎮巡官預守戰之備且請用賢納諫罷土木屏玩好帝頗采納獻民性伉直有執持帝或不能從卒無所徇帝初即位盡斥先朝傳奉官已太監邱福潘傑等死詔官

其弟姪錦衣及司禮太監張欽死以家人李賢承廕賢死復欲官其子儒獻民先後執奏皆不從土魯番素勒垣莽肅爾寇肅州命獻民兼右都御史總制陝西四鎮軍務比至蘭州巡撫陳九疇已破敵獻民再以捷聞還京仍理部事論功廕錦衣世百戶錦衣百戶俞賢中官泰養子也以中旨管事諫官爭之獻民言祖宗有舊制孝廟有禁例陛下登極有明詔賢無公家庸又非泰子姓猥以廕養竊名器紊數典章不可之大者宜納諫官



言弗聽錦衣副千戶李全王邦奇等以冒濫汰去至是奏辨不已下部覆議獻民言全等足不履行陣而坐論首功身不隸公家而躡躑顯秩陛下登極汰去者三百餘人人心稱快萬一倖端再啟則前詔皆虛將來奏擾有何紀極帝竟授全等試百戶獻民復奏曰令出惟行勿惟反今以小人奏辨一旦復官九十餘人徇左右私壞祖宗法竊為陛下惜之明旨不許夤緣管事而奔競已成風矣不許比例陳乞而奏擾已踵至矣誰生厲階

至今為梗望仍斥全等以息人言消天變言官任洛等亦以為言不聽會寧夏總兵官种勛行賂京師偵事者獲其籍獻民名在焉給事蔡經御史高世魁等交章劾之獻民因引疾歸居二年邦奇許前尚書彭澤詞連獻民逮下刑部獄法司劾獻民奉命專征未至其地掠功妄報失大臣體宜奪職閒住削其世廕詔可初大禮議起獻民數偕廷臣疏爭及左順門哭諫又與徐文華倡之帝由此不悅卒得罪隆慶初贈卹如制

秦金字國聲無錫人弘治六年進士授戶部主事歷郎  
中正德初遷河南提學副使改右叅政守開封破趙璆  
於陳橋歷山東左右布政使承寇躡後與巡撫趙璜共  
拊循瘡痍始起九年擢右副都御史巡撫湖廣諸王府  
所據山場湖蕩皆奏還之官降盜賀璋羅大洪復叛討  
平之彬州桂陽徭襲福全稱王金先後破砦八十餘斬  
首二千級禽福全及其黨劉福興等錄功增俸一級廕  
錦衣世百戶力辭得請入為戶部右侍郎世宗即位改

吏部言官論金無人倫鑑復改戶部轉左署部事外戚邵喜乞莊田金述祖制請按治帝宥喜命都察院禁如制中旨各宮仍置皇莊遣官校分督金言西漢盛時以苑囿賦貧民今奈何剥民以益上乞勘正德間額外侵占者悉歸其主而盡撤管莊之人帝稱善即從其議嘉靖二年擢南京禮部尚書率諸臣上疏曰陛下繼統以來昭德塞違勵精圖治動無過舉宜召天和而灾眚頻告者何也詩曰靡不有初鮮克有終陛下登極一詔百

度咸貞天下拭目望至治比來多與詔違百司罔遵萬  
民失仰此詔令不能如初也即位之初逐庸回任耆舊  
比內閣擬旨輒中改至疏請徒荅溫語此任賢不能如  
初也即位之初聽言如流朝請暮報比來事涉戚畹宦  
寺雖九卿執奏科道交章皆曰業經有旨此聽納不能  
如初也即位之初凡先朝傳陞乞陞等官一切釐革比  
來恩澤過濫封拜頻煩此慎名器不能如初也即位之  
初凡奸黨巨惡俱付三法司比來輒下鎮撫此謹國法

不能如初也即位之初首命戶部減馬房糧芻之半且令科道官備覈馬數乃因太監閻洪等言遂寢前詔此恤民瘼不能如初也即位之初遣斥法王佛子國師禪師比來於禁地設齋醮此崇正道不能如初也即位之初精明充盛比來聖躬弗豫天顏未復此耆精神不能如初也夫初政所以清明者政出公朝而左右不預也今政所以淆濶者政在左右而外廷不知也惟政不可一日不在朝廷惟權不可一日移於左右所謂政在朝

廷者非必皆獨運也股肱有託耳目有寄即主威重於九鼎國勢安於泰山自古帝王制御天下操此術而已不則官府之勢隔而信任有所偏婦寺之情親而聽受有所蔽名曰總攬而太阿之鑄實移於下矣章下禮部尚書汪俊力勸帝採納報聞尋就改兵部孫交去召為戶部尚書帝欲考興獻帝金偕廷臣伏闕爭又與何孟春等條張璁建議之非及上聖母冊金及趙璜等復不至帝頻詰讓金為人樂易及居官一以廉正自持在戶

部尤孜孜為國永福長公主乞寶坻武清地以金言頗減撫寧山海莊地賜魏國公徐達者達卒仍歸之官定國公光祚請之金執不可給事中黃重御史張珩等先後爭金等復以為言始報許內府諸監局軍匠至數千人中官梁諫請下部採金玉珠石金皆執奏不聽奸人逯俊等乞兩淮鹽引三十萬帝許之金力爭不可積失帝旨六年春以考察自陳致仕馳驛給夫廩如制歸五年薦者不已乃起南京戶部疏陳利民六事尋召為工



部尚書加太子少保帝與張孚敬李時評諸大臣以金為賢頗嫌其老居數月加太子太保改南京兵部踰歲致仕歸二十三年卒年七十八贈少保諡端敏孫柱以諸生授中書舍人大學士高拱得罪倉黃去京師門生皆避匿柱獨追送百里外吳中行疏論張居正奪情被杖下詔獄柱挾醫視湯藥遂忤居正遷魯府審理尋假考察罷之

趙璜字廷實安福人少從父之官墜江中不死稍長行

道上得遺金悉還其主登弘治三年進士授工部主事  
改兵部歷員外郎出為濟南知府猾吏舞文積歲為蠹  
璜擇愿民教之律令得通習者二十餘人逐吏而代之  
漢庶人牧場久籍於官募民佃德王府奏乞之璜勘還  
之民閱七年政績大著正德初擢順天府丞未上劉瑾  
惡璜坐巡撫朱欽事逮下詔獄除名瑾誅復職遷右僉  
都御史巡撫宣府尋調山東河灘地數百里賦流民墾  
而除其租番僧乞徵以充齋糧帝許之璜力爭得免曲

阜為賊破闕里林廟在曠野璜請移縣就闕里從之擢  
工部右侍郎總理河道以邊警改理畿輔戎備事定命  
振順天諸府饑還佐部事世宗即位進左侍郎掌部事  
裁宦官賜葬費及御用監料價革內府酒醋麵局歲徵  
鐵甄價銀歲鉅萬嘉靖元年進尚書劉瑾創元明宮糜  
財數十萬瑾死奸人獻為皇莊帝即位斥以予民既而  
中旨令仍舊璜言詔下數月而忽更示天下不信帝即  
報許會方修仁壽清寧宮費不繼璜因請與石景山諸

房舍並斥賣以資用可無累民帝可之給事中徐景嵩等謂詔書許還民官不當自鬻劾璜璜疏辨并發景嵩他事御史張鵬翰言璜撫言官無大臣誼帝責鵬翰黨庇景嵩竟斥其同官陳江亦以劾璜被責求去給事中章僑言璜一舉逐兩諫官甚損國體尚書彭澤復奏僑非是僑再辨帝兩解之詔營后父陳萬言第估工值六十萬璜持之萬言愬於帝下郎中員外二人詔獄璜言二臣無與乞罪臣帝不聽其後論救踵至萬言不自安

再請貸二人獲釋工價亦大減三年顯陵司香內官言陵制狹小請改營視天壽山諸陵璜言陵制與山水相稱難槩同帝納其言已帝欲遷顯陵璜不可乃寢詔建玉德殿景福安喜二宮璜請俟仁壽宮成徐議其事帝不許頃之以災異申前請帝始從之并罷仁壽役江西建真人府陝西督織造皆遣中使璜皆疏爭營建世廟中官所派物料戶部多裁省帝以問璜璜言曩造乾清坤寧兩宮所積餘貲足移用帝遂報可璜為尚書六年

值帝初政銳意釐剔中官不敢撓故得舉其職後論執不已諸權倖嫉者衆帝意亦寢疏璜素與秦金齊名考察自陳與金俱致仕廷臣乞留不許馳驛給夫廩如故事璜有幹局多智慮事禁錯他人相顧愕眙璜立辨既去人爭薦之十一年召復故官未上卒贈太子太保諡莊靖

鄒文盛字時鳴公安人弘治六年進士除吏科給事中遼東巡撫韓重効鎮守中官廖玘文盛偕郎中楊茂仁

勘實其罪謫長陵司香朶顏三衛屢擾邊文盛還奏制  
馭六策尚書劉天夏深善之下之邊吏尋出覈兩廣糧  
儲思恩土官岑濬與田州岑猛構兵文盛言田州廣西  
之藩蔽李蠻田州之干城叅政武清受濬重賂以計殺  
蠻釀成禍亂制敕房供事叅議岑業濬懿親為彌縫於  
中漏我機事請先誅二人而後行討業有內援帝不聽  
清尋以考察罷正德初厯戶科都給事中出為保定知  
府累遷福建左布政使十一年以右副都御史巡撫貴

州清平苗阿旁阿階阿革稱王巡撫曹祥調永順保靖  
土兵討之尋被劾罷阿旁等據香爐山興隆偏橋平越  
新添龍里諸衛咸被其患文盛至檄川湖兵協剿以貴  
州兵擣礮木砦禽阿革川湖兵至抵山下山壁立惟小  
徑五賊皆樹柵仰攻不能克乃製戰樓與崖齊乘夜雨  
附崖登拔柵焚廬舍賊奔後山據絕頂官軍乘間梯藤  
木以上遂禽阿旁餘賊盡平移師討平龍頭都黎都蘭  
都蓬密西大支馬羅諸砦苗先後斬降無算錄功增



俸二等廕子錦衣世百戶力辭免芒部陳聰等為亂討破之四川土舍重安馮綸與凱里楊弘有怨弘卒綸糾諸苗相讐殺侵軼貴州境文盛遣叅議蔡潮詣播州督宣慰楊斌撫定之請復設安寧宣撫司以弘子襲而錄潮功尚書王瓊以專擅為潮罪不敘頃之改蒞南京都察院世宗即位召為戶部左右侍郎遷南京右都御史就改戶部尚書嘉靖六年戶部尚書秦金罷召文盛代之首疏鹽政錢法十一事文盛為人廉謹踐踐若無能

與孫交泰金趙璜咸稱長者歲餘以年至再疏乞歸卒  
贈太子少保諡莊簡

梁材字大用南京金吾右衛人弘治十二年進士授德  
清知縣勤敏有異政正德初遷刑部主事改御史出為  
嘉興知府調杭州田租例參差材為酌輕重立畫一之  
法遷浙江右參政進按察使鎮守中官畢真與宸濠通  
將舉城應之材與巡按張縉劫持真奪其兵衛尋以憂  
去嘉靖初起補雲南土官相讎殺累年材召其酋曰汝

罪當死今貰汝以牛羊贖御史訝其輕材曰如是足矣  
急之變生諸酋衷甲待變聞無他迺止歷貴州廣東左  
右布政使吏民輸課令自操權衡吏不得預時天下布  
政使廉名最著者二人材與姚鏌也六年拜右副都御  
史巡撫江西甫兩月召為刑部左侍郎尋改戶部遂代  
鄒文盛為尚書自外僚登六卿不滿二載自以受恩深  
益盡職上言臣考去年所入止百三十萬兩而所出至  
二百四十萬加催徵不前邊費無節凶荒又多奏免國

計安所辦詳求弊端一宗藩二武職三冗食四冗費五  
逋負乞集廷臣計畫條請於是宗藩武職各議上三事  
其他皆嚴為節帝悉報可惟武職閒住者議停半俸帝  
不納經費大省國用亦充中官麥福請盡徵牧馬草場  
租材不可侍郎王軌清勲戚莊田言宜量等級為限材  
奏成周班祿有土田祿由田出非常祿外復有土田今  
勲戚祿已踰分而陳乞動千萬請申禁之自特賜外量  
存三之一以供祀事帝命並清已賜者額外侵據悉還

之民勢豪家乃不敢妄請乞畿輔屯田御史督理正統間易以僉事權輕屯政日弛材請仍用御史御史郭弘化言天下土田視國初減半宜通行清丈材恐紛擾請但敕所司清釐籍難稽者始履畝而丈帝悉可之母喪去服除起故官大同巡撫樊繼祖請益軍餉材言大同歲餉七十七萬有奇例外解發又累萬較昔已數倍日益月增太倉銀不足供一鎮無論九邊也繼祖數請不得議開事例下戶兵二部行之時修建兩宮七陵役京

軍七萬郭勛請給月糧冬衣材言非故事如所請當歲費銀四十五萬且冬衣例取內庫非部事勛怒劾材悞公帝詰責材竟如勛奏勛復建言三事請開礦助工餘鹽盡輸邊漕卒得攜貨物材議不盡行勛益怒材初為戶部值帝勤政力祛宿弊多見從及是屢忤權倖不得志乃乞改南為給事中周琬所劾下吏部尚書許讚等請留之帝不悅令與材俱對狀材引罪得宥而讚等坐奪俸材由此失帝意考尚書六年滿遂令致仕初徽王

守莊者與佃人訟材請革守莊者令有司納租於王報  
可王奏不便帝又從之材已去侍郎唐胄等執初詔帝  
大怒并責材令以右侍郎閒住而奪胄俸下郎官詔獄  
明年戶部尚書李廷相罷帝念材廉勤大臣亦多薦者  
乃召復故官加太子少保三掌國計砥節守公如一日  
帝眷亦甚厚其秋考察京官特命監之有大獄不能決  
又命兼掌刑部事帝歎曰尚書得如材者十二人吾無  
憂天下矣大工頻興役外衛班軍四萬六千人郭勛籍

其不至者責輸銀雇役廩食視班軍廷相嘗量給之材  
堅持不予勛劾材帝命補給勛又以軍不足籍逃亡軍  
布棉折餉銀募工材言令京班軍四萬餘已足用不宜  
藉口耗國儲帝從其奏勛益怒劾材變亂舊章先是醮  
壇須龍涎香材不以時進帝銜之遂責材沽名誤事落  
職閒住歸旋卒年七十一隆慶初贈太子太保諡端肅  
當嘉靖中歲大臣或阿上取寵材獨不撓以是終不容  
自材去邊儲國用大窘世宗乃歎曰材在當不至此



劉麟字元瑞本饒州安仁人世為南京廣洋衛副千戶  
因家焉績學能文與顧璘徐禎卿稱江東三才子弘治  
九年進士言官龐泮等下獄麟偕同年生陸崑疏救除  
刑部主事進員外郎錄囚畿內平反三百九十餘人正  
德初進郎中出為紹興府知府劉瑾銜麟不謁謝甫五  
月撫前錄囚細故罷為民士民醵金贖不受為建小劉  
祠以配漢劉寵因寓湖州與吳琬施侃孫一元龍霓為  
湖南五隱瑾誅起補西安遭父憂樂吳興山水奉父柩

葬焉遂居湖州起陝西左叅政督糧儲都御史鄧璋督師議加賦充餉麟力爭會陝民詣闕懇得寢尋遷雲南按察使謝病歸嘉靖初召拜太僕卿進右副都御史巡撫保定六府中官耿忠守備紫荆多縱麟劾奏之請捐天津三衛屯田課及出庫儲給河南三衛軍月餉徵逋課以償皆報可帝因諭戶部中外軍餉未給者悉補給之再引疾歸起大理卿拜工部尚書侍衛軍不給衣履錦衣帥駱安援紅盔軍例以請麟執不可詔量給銀自

製後五載一給為常四司財物悉貯後堂大庫司官出  
納多侵漁麟請特除一郎官主之帝稱善因賜名節慎  
庫已上節財十四事汰內府諸監局冒破錢中官大恨  
及顯陵工竣執役者咸覬官麟止擬賚羣小愈怨會帝  
納諫官言停中外雜派工役麟牒停浙江蘇松織造而  
上供袍服在停中中官吳勲以為言遂勒麟致仕久之  
顯陵殿閣雨漏追論麟落職麟清修直節當官不撓居  
工部為朝廷惜財謹費僅踰年而罷居郊外南坦賦詩

自娛守為築一臺令為構堂始有息游之所家居三十餘年廷臣頻論薦晚好樓居力不能構懸籃輿於梁曲卧其中名曰神樓文徵明繪圖遺之年八十七卒贈太子少保諡清惠

蔣瑤字粹卿歸安人弘治十二年進士授行人正德時歷兩京御史陳時弊七事中言內府軍器局軍匠六千中官監督者二人今增至六十餘人人占軍匠三十他局稱是行伍安得不耗并言傳奉官及濫收校尉勇士

並宜釐革劉瑾雖誅權猶在宦豎有旨詰問且言自今  
如瑤議者毋覆奏尋出為荊州知府築黃潭隄調揚州  
武宗南巡至揚瑤供御取具而已無所贈遺諸嬖倖皆  
怒江彬欲奪富民居為威武副將軍府瑤執不可彬閉  
瑤空舍挫辱之脅以帝所賜銅瓜不為懾會帝漁獲一  
巨魚戲言直五百金彬即畀瑤責其直瑤懷其妻簪珥  
袿服以進曰庫無錢臣所有惟此帝笑而遣之府故有  
瓊花觀詔取瓊花瑤言自宋徽欽北狩此花已絕今無

以獻又傳旨徵異物瑤具對非揚產帝曰苧白布亦非  
揚產耶瑤不得已為獻五百疋當是時權倖以揚繁華  
要求無所不至微瑤民且重困駕旋瑤扈至寶應中官  
邱得用鐵絙繫瑤數日始釋竟扈至臨清而返揚人見  
瑤無不感泣迨遷陝西叅政爭出貲建祠祀之名自此  
大震嘉靖初厯湖廣江西左右布政使以右副都御史  
巡撫河南帝命桂萼等覈巡撫官去留令瑤歸候調已  
累遷工部尚書四郊工竣加太子少保西苑宮殿成帝

置宴見瑤與王時中席在外命移殿內而移皇親於殿  
右以讓瑤曰親親不如尊賢其重瑤如此時土木繁興  
歲費數百萬計瑤規畫咸稱帝意數有賚予以憂去久  
之自南京工部尚書召改北部帝幸承天瑤扈從京師  
營建役京軍多為豪家占匿至是大工頻仍歲募民  
充役費二百餘萬瑤以為言因請停不急者豪家所匿  
軍畢出募直大減以老致仕去瑤端亮清介既歸僻處  
陋巷與尚書劉麟顧應祥輩結文酒社徜徉峴山間卒

年八十九贈太子太保諡恭靖

王廷相字子衡儀封人幼有文名登弘治十五年進士  
選庶吉士授兵科給事中以憂去正德初服闋至京劉  
瑾中以罪謫亳州判官量移高淳知縣召為御史疏言  
大盜四起將帥未能平由將權輕不能禦敵兵機疏不  
能扼險也盜賊所至鄉民奉牛酒甚者為効力盜有生  
殺權而將帥反無之故兵不用命宜假便宜退却者必  
斬河南地平曠賊易奔山西地險阻亦縱深入將帥罪



也若陳兵黃河之津使不得西分扼井陘天井使不得東而主將以大軍威之則賊進退皆窮可不戰禽矣帝切責總督諸臣悉從其議已出按陝西裁抑鎮守中官廖堂被誣時已改督京畿學校逮繫詔獄謫贛榆丞屢遷四川僉事山東副使皆提督學校嘉靖二年舉治行卓異再遷山東右布政使以右副都御史巡撫四川討平芒部賊沙保尋召理院事歷兵部左右侍郎遷南京兵部尚書叅贊機務初有詔省進貢快船守備太監賴

後傳旨非祖制者龍江大勝新江浦子江淮五關守臣  
藉稽察權利安慶九江藉春秋閱視索賂廷相皆請革  
之草場蘆課銀率為中官楊奇卜春及魏國公徐鵬舉  
所侵蝕以廷相請逮問奇春奪鵬舉祿三月入為左都  
御史疏言南京守備權太重不宜令魏國世官給事中  
曾忭亦言之遂解鵬舉兵柄居二年加兵部尚書兼前  
官提督團營仍理院事兩考滿加太子少保畿民盜天

壽山陵樹巡按楊紹芳引盜大祀神御物律斬廷相言  
大祀神御物者指神御在內祭器帷帳之物而言律文  
盜陵木者止杖一百徒三年今舍本律非刑之平忤旨  
罰俸一月帝將辛承天廷相與諸大臣諫不納扈從還  
以九年滿加太子太保雷震奉先殿廷相言人事修而  
後天道順大臣法而後小臣廉今廉隅不立賄賂盛行  
先朝猶暮夜之私而今則白日之攫大臣污則小臣悉  
倣京官貪則外臣無畏臣職憲紀不能絕其弊乞先罷

斥用以刺尚書嚴嵩張璫輩帝但諭留而已初廷相請以六條考察差還御史帝令疏其所未盡編之憲綱乃取張孚敬汪鋐所奏列及新所定凡十五事以進悉允行之及九廟灾下詔修省因敕廷相曰御史巡方職甚重卿總憲有年自定六條後不考黜一人今宜痛修省廷相惶恐謝廷相掌內臺最久有威重督團營與郭勛共事竣巡其間不能有所振飭給事中李鳳來等論權貴奪民利章下都察院廷相檄五城御史覈實遲四十

餘日給事中章允賢遂劾廷相徇私慢上帝方詰責而廷相以御史所覆聞惟郭勛侵最多帝令勛自奏於是劾勛者羣起勛復以領敕稽留觸帝怒下獄責廷相朋比阿黨斥為民越三年卒廷相博學好議論以經術稱於星厯輿圖樂律河圖雒書及周邵程張之書皆有所論駁然其說頗乖僻隆慶初復官贈少保諡肅敏

贊曰喬宇守南京從容鎮靜內嚴警備可謂能當大事者矣觀宇與孫交等砥節奉公懇懇廷諍意在杜塞倖

門裨益國是雖得君行政未能媲美蹇夏要其清嚴不苟行無瑕尤於前人亦不多讓蔣瑤為尚書功名損於治郡王廷相掌內臺風力未著是殆其時為之歟



欽定四庫全書

明史卷一百九十四考證

喬宇傳條上道中所見軍民困苦六事

臣方煒按宇

所條六事曰恤邊民厚邊軍廣儲蓄慎守令省科派  
重祀典見陳璘所撰行狀謹附識

喬宇傳久之改兵部叅贊機務

臣方煒按宇改兵部

時常條宿弊六事曰嚴操練禁役占汰沉員買戰馬  
定船差修船隻見獻徵錄謹附識

喬宇傳寧王宸濠反揚言旦夕下南京宇嚴為之警備

臣方煒按南京御史林有年以言事被逮宇在兵部論救之得釋見陳璘所撰行狀謹附識

喬宇傳世宗即位召為吏部尚書臣方煒按世宗即

位宇有請早視朝以隆聖政一疏見明實錄謹附識

孫交傳命經畧黃花鎮諸邊臣方煒按交是時并請

銓衛學教授以訓武官子弟見顧璘所撰傳謹附識

孫交傳進戶部右侍郎提督倉場臣方煒按是時內



外倉紛置宦監漕卒大困交上疏極論得裁其半見  
識大錄謹附識

孫交傳中旨與禮部尚書傅珪並致仕言官多請留不  
報臣方煒按是時請留交及珪者為給事中李陽  
春御史原軒等見獻徵錄謹附識

孫交傳守珠池中官詔毋得預守土事臣方煒按交

嘗論安陸皇莊租課宜付有司不報見獻徵錄謹附  
識

孫交傳卒年八十謚榮僖

臣

方煒按明倫大典成上

念交無所阻報進光祿大夫柱國見明實錄謹附識

林俊傳俊得謫姚州判官

臣

方煒按俊被謫時王恕

有乞還俊一疏見雷禮列卿記謹附識

林俊傳用薦擢雲南副使

臣

方煒按俊為副使時南

京御史姜綰等為守備太監蔣琮劾奏多左遷者俊

上疏論救見雷禮列卿記謹附識

林俊傳正德四年起撫四川

臣

方煒按俊在蜀時疏

請上還宮并預養宗室之賢名還劉健謝遷林瀚王  
鏊韓文以復舊政見雷禮列卿記謹附識

林俊傳于是俊前後被切責

臣方煒按五年劉瑾伏

誅俊在川疏賀並言嘗草疏劾瑾欲俟賊平上之今  
幸假手張永瑾雖死大權猶在內臣因極陳其害詔  
責其奏成不進懷奸畏罪第賊未平置勿問見明實  
錄所謂前後被切責者指此謹附識

秦金傳授戶部主事

臣

方煒按金為戶部時宦戚秦

乞鹽引每從中下金輒奏格之見獻徵錄謹附識

秦金傳守開封破趙燧于陳橋

臣方煒按是時燧等

將薄封丘金會叅將宋振率兵邀之禽其魁開封民為立生祠祀之見雷禮列卿記謹附識

趙璜傳改兵部歷員外郎

臣方煒按璜為兵部員外

時尚書馬文升薦其才堪大用見雷禮列卿記謹附識

趙璜傳尋調山東

臣方煒按是時錢寧以錢鬻于山

東為璜所禁弗得售見雷禮列卿記謹附識

趙璜傳擢工部右侍郎總理河道

臣方煒按正德十

年黃陵岡河變運道幾梗乃擢璜總理之見明實錄  
謹附識

趙璜傳命振順天諸府饑還佐部事

臣方煒按趙璜

佐工部時疏濬京城九門城河尚書彭澤總兵郭勛  
議用民夫璜奏請悉用營軍上允之見雷禮列卿記  
謹附識

鄒文盛傳歷戶科都給事中

臣

方煒按文盛為給事

時有崇儉約省科稅裁撫治及請設憲臣以督捕處  
番舶以通貨等疏見明實錄謹附識

梁材傳正德初遷刑部主事改御史

臣

方煒按材為

御史時劉瑾既誅榜諭天下材所屬草也李東陽見  
而愛之及作紀事稿付史館東陽皆以屬材見雷禮  
列卿記謹附識

梁材傳尋改戶部又遂代鄒文盛為尚書

臣

方煒按

材擢戶部尚書時特勅監吏部都察院考察人以為  
異典見琬琰錄謹附識

梁材傳勛益怒劾材變亂舊章

臣

方煒按材是時復

按勛不法十事草疏未上僚友泄其語遂為勛所中  
落職歸見獻徵錄謹附識

劉麟傳起大理卿拜工部尚書

臣

方煒按麟起大理

卿尋遷刑部侍郎拜工部尚書見獻徵錄傳未詳載  
謹附考

劉麟傳已上節財十四事

臣

方煒按麟所上節財十

四事獻徵錄識大錄及他書皆無可考謹識

蔣瑤傳調楊州

臣

方煒按瑤初蒞揚時值歲飢瑤請

漕萬石賑之見識大錄謹附識

王廷相傳歷兵部左右侍郎

臣

方煒按廷相為兵部

侍郎時騰驤四衛軍隸在中官多竄市人名幾三萬

廷相盡裁其濫僅存五千人見識大錄謹附識

明史卷一百九十四考證